



2. marts 2010

Inatsisartut Suleriaasianni § 36 imm. 2 naapertorlugu Naalackersuisunut apeqqut imaattoq matumuuna saqqummiuppara:

Naalackersuisunut apeqqut:

Naalackersuisut qanoq isumaqarpat, napparsimavimmi pilattartinniarlutik utaqqisut tamarmik pujortartarunnaarnissamik neqeroorfigineqarpata?

(Inatsisartunut ilaasortaq Justus Hansen, Demokraatit)

Tunngavilersuut:

Kikkut tamarmik ilisimavaat, peqqinnissaqarfimmi ukiut tamaasa napparsimasut katsorsarneqarnissaannut milliunerpassuit atorneqartarmata. Ilimatusarnerit uppersinikuuat, pujortartartut pilattartinnerni ajoqutissarsinissaat qaninnerusartoq, pujortarnerup aap kaavinnera kingaallisittarmagu kinguneranillu pilattartereernerup kingorna ikip mamikkiartornera arriinnerulertarluni.

Sverigemi Karolinska Instituttimi pujortarunnaarsitsiniarnermut atatillugu misissuinerit marluk ingerlanneqarsimapput, taakkulu tamarmik ersarilluinnartumik inerneqarput. Misissuinerimi siullermi napparsimasut nakkartoortartut, sungaluttut, siffialuttut, seeqquluttullu 117-t neqeroorfigineqarput pujortartarunnaarsinniarlugit. Napparsimasut neqeroorfigitipput pilattartinneqarnissartik sapaatip akunnerinik pingasunik sisamanik sioqqullugu pujortarunnaassasut. Kinguneranik nappaatit ilakutannguuttut affaannangortinneqarput.

Misissuinerup aappaani peruluttut nagguaajarsimanertik pillugu pilattartittussat, passunneqareermik kingorna pujortarunnaaqqullugit neqeroorfigineqarput. Aamma tassani kinguneranik nappaatit ilakutannguuttut affaannangortinneqarput.

Taamaasilluni tassa ilisimatuussutsikkut uppersineqarpoq, pilattartinnissamut atatillugu pujortarunnaartarneq sukkanerusumik aaqqitsitsisartoq. Tamakku peqqinnissakkut iluaqusiinerit ungasinnerusoq isigalugu ikinnerusut uneqqittalernerannik kinguneqartassapput, pilattartissimasullu



ulluni ikinnerni uninngasalerlutik, taakku tamarmik inuiaqatigiit aningaasarsiornerannut iluaqusiissapput.

Aamma maluginiartariaqarpoq, PAARISA-p ataaniittup Inuunerittap pujortartarnerup akiornissaa pingaarnertut suliniarfigimmagu, pilattartilinnginnermilu pujortarunnaarnissamut neqeroorfigitittalernerup taamatut suliniuteqarneq aamma ikorfertussaavaa. Allatut ajornartumik soorunami suliniutigineqartussaassaaq, napparsimasut pujortartarunnaarnissamut neqeroorfigitissimasut, pujortaqqilertannginnissaat. Pujortarunnaarnissamut neqerooruteqartarnikkut, Peqqinnissaqarfimmi pujortartartut katsorsartittarnerisa nukittorsarnissaannik Inuunerittap anguniagaqarnera aamma taparserneqassaaq.

Apeqqut piffissarititaasup iluani, ullut qulit naliginnaasumik sulliviusut qaangiutsinnagit akeqquneqarpoq.